

Na osnovu člana 1. stav (3) Zakona o komunikacijama Bosne i Hercegovine ("Službeni glasnik BiH", br. 31/03, 75/06, 32/10 i 98/12), a u vezi člana 3. stav (2) i člana 8. stav (1) tačka h) Zakona o Agenciji za identifikacione dokumente evidenciju i razmjenu podataka Bosne i Hercegovine ("Službeni glasnik BiH", broj 56/08) i člana 17. Zakona o Vijeću ministara Bosne i Hercegovine ("Službeni glasnik BiH", br. 30/03, 42/03, 81/06, 76/07, 81/07, 94/07 i 24/08), na prijedlog Ministarstva finansija i trezora Bosne i Hercegovine, Vijeće ministara Bosne i Hercegovine na 64. sjednici, održanoj 18. septembra 2013. godine, donijelo je

ODLUKU

O UTVRĐIVANJU NAČINA KORIŠTENJA POSTOJEĆIH TELEKOMUNIKACIJSKIH MREŽA U INSTITUCIJAMA BOSNE I HERCEGOVINE ZA POTREBE RAZMJENE PODATAKA I UPRAVLJANJE FINANSIJAMA U INSTITUCIJAMA BOSNE I HERCEGOVINE

Član 1.

(Predmet odluke)

Ovom odlukom utvđuje se način korištenja postojećih telekomunikacijskih mreža u vlasništvu Bosne i Hercegovine s ciljem razmjene podatka između Ministarstva finansija i trezora Bosne i Hercegovine i drugih institucija Bosne i Hercegovine.

Član 2.

(Razmjena podataka)

- (1) Razmjenu podataka Ministarstvo finansija i trezora Bosne i Hercegovine vrši preko licencirane mreže za prenos podataka (u daljnjem tekstu: mreža) uspostavljene u skladu sa Zakonom o Agenciji za identifikacione dokumente, evidenciju i razmjenu podataka Bosne i Hercegovine ("Službeni glasnik BiH", broj 56/08), sa institucijama koje su korisnici mreže i to: Agencija za identifikacione dokumente, evidenciju i razmjenu podataka Bosne i Hercegovine (u daljnjem tekstu: IDDEEA), Uprava za indirektno oporezivanje Bosne i Hercegovine, Ministarstvo sigurnosti Bosne i Hercegovine, Državna agencija za istrage i zaštitu Bosne i Hercegovine, Direkcija za koordinaciju policijskih tijela Bosne i Hercegovine, Granična policija Bosne i Hercegovine, Služba za poslove sa strancima, Ministarstvo odbrane Bosne i Hercegovine, Ministarstvo vanjskih poslova Bosne i Hercegovine, Obavještajno sigurnosna agencija Bosne i Hercegovine, Sud Bosne i Hercegovine, Tužilaštvo Bosne i Hercegovine, Visoko sudsko i tužilačko vijeće Bosne i Hercegovine, Centralna izborna komisija i druge institucije Bosne i Hercegovine koje imaju policijska ovlaštenja ili su dio sistema odbrane.
- (2) Razmjena podataka putem mreže odnosi se na korištenje postojećih sistema kojima upravlja Ministarstvo finansija i trezora Bosne i Hercegovine, a institucije iz stava (1) ovog člana na ovaj način obavljaju sljedeće poslove:
 - a) razmjenu podataka vezanu za naplatu i kontrolu prihoda po osnovu novčanih kazni za prekršaje i razmjenu podataka vezanu za naplatu i kontrolu prihoda po osnovu izdavanje ličnih dokumenata, te drugih prihoda za koje je nadležna IDDEEA;
 - b) razmjenu podataka vezanu za planiranje i praćenje izvršenja Budžeta institucija Bosne i Hercegovine i međunarodnih obaveza Bosne i Hercegovine;
 - c) razmjenu podataka vezanu za sistem trezorskog poslovanja;
 - d) razmjenu podataka vezanu za centralizirani sistem za obračun plaća i naknada;

- e) razmjenu podataka vezanu za druge informacijske sisteme u vezi sa finansijskim poslovanjem institucija Bosne i Hercegovine;
 - f) razmjena podataka sa subjektima platnog prometa u slučaju vršenja elektronskih uplata po osnovu novčanih kazni za prekršaje i razmjenu podataka vezanu za naplatu i kontrolu prihoda po osnovu izdavanje ličnih dokumenata, te drugih prihoda za koje je nadležna IDDEEA.
- (3) Korištenje mreže od strane Ministarstva finansija i trezora Bosne i Hercegovine zasniva se na standardima sigurnosti koje utvrđuje IDDEEA u skladu sa Zakonom o Agenciji za identifikacione dokumente, evidenciju i razmjenu podataka Bosne i Hercegovine, u smislu korištenja komunikacijske opreme i standardima vezanim za sigurnost komunikacija.
- (4) Razmjena podataka za institucije iz stava (1) ovog člana vrši se korištenjem postojeće opreme koju koriste budžetski korisnici.
- (5) Ministarstvo finansija i trezora Bosne i Hercegovine dužno je da vrši zamjenu postojeće opreme u skladu sa tehničkim zahtjevima koji proističu iz obaveze za primjenu sigurnosnih stanadarda.

Član 3.

(Korištenje resursa za druge institucije Bosne i Hercegovine)

- (1) Ministarstvo finansija i trezora Bosne i Hercegovine može posredstvom mreže vršiti razmjenu podataka i sa drugim institucijama Bosne i Hercegovine i budžetskim korisnicima po osnovu korištenja sistema navedenih u članu 2. stav (2) ove Odluke, ukoliko za to postoje tehnički uslovi i uz obaveznu primjenu standarda sigurnosti shodno odredbama člana 2. stav (3) ove Odluke.
- (2) Ministarstvo finansija i trezora Bosne i Hercegovine obavezno je, prije nego što izvrši priključenje na mrežu institucijama iz stava (1) ovog člana, podnijeti zahtjev IDDEEA-i za utvrđivanje ispunjenosti tehničkih uslova i sigurnosnih standarda i davanje saglasnosti za korištenje mreže u ovim slučajevima.

Član 4.

(Osiguranje sredstava i tehničkih uslova za provođenje Odluke)

- (1) Ministarstvo finansija i trezora Bosne i Hercegovine će u okviru budžeta planirati sredstva i izvršiti nabavku potrebne komunikacijske opreme potrebne za funkcioniranje sistema razmjene podataka putem mreže za korisnike iz člana 3. ove Odluke.
- (2) IDDEEA će pružiti tehničku podršku za uvođenje i puštanje u rad sistema za razmjenu podataka i osigurati dostupnost standarda u vezi sa zaštitom sigurnosti razmjene podataka.
- (3) Institucije Bosne i Hercegovine i Ministarstvo finansija i trezora Bosne i Hercegovine odgovorni su za primjenu sigurnosnih standarda koji se odnose na korištenje mreže.

Član 5.

(Nadležnost za realizaciju)

Za realizaciju ove Odluke zadužuju se Ministarstvo finansija i trezora Bosne i Hercegovine, IDDEEA i institucije Bosne i Hercegovine koje će koristiti mrežu za razmjenu podataka.

Član 6.

(Stupanje na snagu)

Ova Odluka stupa na snagu danom donošenja i objavljuje se u "Službenom glasniku BiH".

VM broj 201/13
18. septembra 2013. godine
Sarajevo

Predsjedavajući
Vijeća ministara BiH
Vjekoslav Bevanda, s. r.